

„Avaz“ saznaje Istraga o napadu na Ambasadu SAD u Sarajevu

Agenti FBI-ja žele saslušati teroristu

Jašarević:
Počinio
teroristički
napad

O tome hoće li pristati na razgovor s američkim istražiteljima odlučit će sam Jašarević • Uhapšeni iz Maoče još se nalazi u SIPA-i

Dubravko Čampara, tužilac Tužilaštva BiH, koji rukovodi istragom o napadu na Ambasadu SAD u Sarajevu, kazao je za „Dnevni avaz“ da jučer nije bilo policijskih pretresa vezanih uz ovaj slučaj, niti novih hapšenja.

Prema njegovim riječima, osoba koja je prekjucher uhapšena u Maoči još je u prostorijama Agencije za istrage i zaštitu (SIPA).

Odluka u petak

- SIPA ga može zadržati 72 sata, tako da će Tužilaštvu BiH biti predat u petak - kazao je Čampara, dodajući da se o uhapšenoj osobi za sada ne mogu otkrivati nikakvi podaci.

Kako saznajemo iz pouzdanog izvora, agenti FBI-ja tražili su da u pritvoru saslušaju napadača na Američku ambasadu u Sarajevu Mevlida Jašarevića. S time je upoznat i tužilac Čampara. Odluku o tome hoće li pristati da razgovara s istražiteljima FBI-ja donijet će sam Jašarević. Njegova

Šta je s oporukom?

Za sada nema zvaničnih informacija jesu li posljednji pretresi u Maoči i Ošvama poduzeti u okviru potrage za DVD-om na kojem se nalazi oporuka Mevlida Jašarevića. O ovom DVD-u u svojoj odbrani govorio je ranije uhapšeni Dino Pečenković iz Maoče tvrdeći da je snimak na kraju završio kod Muniba Ahmetspahića iz Maoče. Ahmetspahić je uhapšen skupa s Pečenkovićem, a njegov advokat Idriz Kamenica tvrdi da sporni DVD nije nađen kod njegovog branjenika niti Pečenkovića.

odluka trebala bi biti poznata u petak.

Istraga o terorističkom napadu se nastavlja, a ne isključuju se ni nova hapšenja i pretresi. Posljednji pretresi obavljani su prekjucher u Maoči, Maglaju i selu Ošve kod Maglaja.

Bez kontakta

U Ošvama je pretresena kuća člana vehabijske zajednice Hamde Fojnice. Kako smo saznali od njegovih rođaka, Hamdo je donedavno živio u Zavidovićima, a zatim se odselio u Ošve. Njegov brat Sinan Fojnica,

s kojim smo jučer razgovarali, kratko nam je kazao da nije kontaktirao s Hamdom te da ne zna zbog čega su mu pretresali kuću.

- Nije mi poznato ni jesu li nešto našli niti gdje se Hamdo nalazi. Ne znam jesu li i njega privodili. Nismo bili u nekom dobrom kontaktu - kazao je Sinan.

E. Ha.

Okrugli sto o stagnaciji BiH

Mur: Ispaštaju građani

Ni 16 godina poslije završetka rata ne postoji zajednička vizija o budućnosti zemlje koja je temeljni uzrok stagnacije koju danas imamo na sceni, rekao je viši zamjenik visokog predstavnika u BiH Roderik Mur (Roderick Moore).

To je pokazala i zajednička analiza „Centra za politike i upravljanje“ (CPU), „Transparency Internationala BiH“ i „Fridrich Naumann Stiftunga“ (FNS), koji su uradili istraživanje o političkom zastoju u BiH.



Katastrofalni rezultati prošlih vlasti

(Foto: F. Fočo)

Nalazi istraživanja koji su prezentirani na okruglom stolu u hotelu „Europa“ u Sarajevu ukazuju na to da je napravljen veoma mali napredak u državi u proteklom periodu.

- Tužno je čuti kako neki lideri zagovaraju raspad države ili produbljivanje nepostojećih etničkih podjela. Umjesto da ovu zemlju povedu u Evropsku uniju, ništa nije urađeno, a za to ispaštaju obični građani. Bez postojanja zajedničke vizije ova zemlja će samo puzati prema Briselu - rekao je Mur. A. Nu.



Berlusconi: Izabrao važnije

Ličnost dana Silvio Berlusconi

Odlazak II Cavalierea

Na kraju mu sudbinu nije odredila afera s prostitutkom, nego ekonomija

II Cavaliere broji svoje posljednje dane na premijerskoj poziciji. Silvio Berlusconi (Berlusconi), koji je dominirao političkim životom Italije u posljednjih 20 godina, odlazi iz vrha vlasti. Desetine izazova, spletki, grešaka i katastrofalnih gafova do sada je „preživio“. Ali ne i ekonomsku krizu.

Berlusconi je za vrijeme svoje vladavine oblikovao Italiju - njenu politiku, kulturu, pa i TV programe i način ponašanja prema ženama. Na kraju, sudbinu mu nije odredila afera s prostitutkom Rubi, zbog koje će se morati pojaviti na sudu, nego ekonomija i strah da

država pada u ambis.

Veliki dugovi zemlje koju je vodio natjerali su ga da stavi važnije interese u prvi plan. Italijanski parlament usvojiti će paket reformi za spas od propasti, bit će održani vanredni izbori i Berlusconi će dobiti nasljednika.

Silvio Berlusconi rođen je u septembru 1936. godine. Postepeno je stvorio „Fininvest“, medijsku kuću koja je vremenom obuhvatila sve najvažnije medije u zemlji. Postao je i vlasnik Nogometnog kluba AC Milan, što mu je donijelo veliku popularnost širom Italije i Evrope. Njegov drugi premijerski mandat najduži je u historiji Republike Italije. I. C.

Reis Cerić u Briselu s vjerskim liderima Naredni susret u Sarajevu

Reisu-l-ulema Islamske zajednice u BiH dr. Mustafa ef. Cerić boravi u dvodnevnoj posjeti Briselu, gdje učestvuje na sastanku Izvršnog odbora Evropskog vijeća vjerskih lidera.

U izjavi za „Avaz“ reis Cerić kaže da učesnici raspravljaju o planovima za 2011.-2013. godinu te da je već poznato da će naredni sastanak vjerskih lidera biti u Sarajevu.

- Cilj je da se u Evropi razvija vjerski dijalog i štite ljudska prava. Jedna od tema je i borba protiv ekstremizma i zloupotrebe vjere u širenju nepovjerenja i netolerancije - rekao je reis Cerić.

Danas će se vjerski lideri sastati s pojedinim evropskim



Reis Cerić: Borba protiv ekstremizma

parlamentarcima, s kojima bi trebali razgovarati o stanju vjerskog dijaloga, suživota i tolerancije u Evropi. F. K.

Spec

• Izricanje prvostepene presude pred Odjelom II za organizirani kriminal, privredni kriminal i korupciju pri Sudu BiH, u predmetu „Rijad Rustempašić i drugi“, zakazano je za danas, javlja Fena. Optužnica tereti Rijada Rustempašića, Abdulaha Handžića i Edisa Velića za terorizam, udruživanje radi činjenja krivičnih djela i neovlašteni promet oružjem i vojnom opremom te proizvodima dvojne namjene, a optuženog Muhameda Rustempašića za neovlašteni promet oružjem.